

Кондак 1

Избранней Богом от человеческого рода послужити
воплощению Предвечнаго Слова, Препоблагословенней Деве
Богородице, достойно воспеваемой от ангел на небеси, мы
грешнии на земли, дерзаем приносить хвалебное пение еже
милостиво от нас приемши, Госпоже Всеблагая, от всяких бед
временных и вечных нас свободи, да зовем Ти:

Радуйся, Милостивая христианом Помощнице.

Икос 1

Архангел Гавриил с небесе послан бысть от Тебе,
Богородице к смиренному послушнику Горы Афонския в пустынной
келии воспевавшему Ти хвалебныя песни пред святою Твоею
иконою, да научит его пети песнь небесную, еже славословят Тя
ангели в Сионе горнем. Темже и мы дольнии, воспоминая таковое
Твое о людех благопромышление, со благодарением вопием Ти
сиче:

Радуйся, достойно восхваляемая от архангел и ангел;
Радуйся, блажимая от всех небесных сил.
Радуйся, присноблаженная и пренепорочная;
Радуйся, Мать Бога нашего.
Радуйся, честнейшая Херувим;
Радуйся, славнейшая без сравнения Серафим.
Радуйся, без истления Бога Слова рождающая;
Радуйся, воистину сущая Богородице.
Радуйся, величаемая на небеси и на земли;
Радуйся, воспеваемая горними и дольными.
Радуйся, едина благословенная в женах;
Радуйся, израстившая нам плод живота.
Радуйся, Милостивая христианом Помощнице.

Кондак 2

Видев послушник пустынный дивнаго пришельца в келию его
пришедшаго и песнь пресладкую Тебе, Владычице, воспевшаго,
неразуме в нем ангела быти, но зело усладися пением его
небесным, и проси, да напишет ему словеса поемья песни: егда
же узре, яко под перстом его каменная дска умягчися, и пишемая
словеса на ней углубишася яко на песце, позна в сем чудесное
действие, и возопи рождшемуся от Тебе Богу Слово: Аллилуиа.

Икос 2

Разум Божественным песни открывая, рече Архангел
послушнику, яко тако воспевает Тя Богородице, ангелов лица в
обителех горних, и повеле ему, да возвестит человеком словеса
песни небесныя, и научит земнородныя ангелоподобно вопити
Тебе:

Радуйся, Благодатная Марие;
Радуйся, яко Господь с Тобою.
Радуйся, Благословенная Дщи Отца Небеснаго;
Радуйся, Неискусобрачная Родительнице Бога Слова.
Радуйся, непорочное селение Духа Святаго;
Радуйся, зачатие несказанное явившая.
Радуйся, рождество нетленное показавшая;
Радуйся, Материю и Девою пребывшая.

Радуйся, во обою непорочно и свято Себе сохранившая;
Радуйся, ангелов чистотою Твоею превозшедшая.
Радуйся, горних умов непрестающее удивление;
Радуйся, человеческого рода возвышение.
Радуйся, Милостивая христианом Помощнице.

Кондак 3

Силою Божиею Гавриил Архангел твердый камень в мягкий воск претвори, и на нем перстом своим написа слова песни хвалебныя Тебе, Богородице, да вси познают великое чудо, и несумненно уверуют, яко тако воистину воспевают Тя горе силы небесныя, имже подражающе, поем величия Твоя, Дево, и в радости духовней вопием прославльшему Тя Богу: Аллилуиа.

Икос 3

Имея простоту душевную и непорочное сердце послушник смиренный, сподобися ангельския беседы и лицезрения чиновачальника горних сил, мы же, лукавством и злобою потемнении, не смеем взирати на святую икону Твою, Владычице, и молим Ти ся прилежно: обрати ны от злб наших десницею Твоею и научи нас во смирении и кротости духа глаголати Тебе:

Радуйся, Гору Афонскую освятившая Твоим благоволением;

Радуйся, холми и дебри ея исполнившая славою Твоих чудес.

Радуйся, ангельскаго явления сподобльшая пустыню ея;

Радуйся, обители иноческия, в ней умножившая во спасение душ человеческих.

Радуйся, подвизающимся в ней в посте и молитве обещавшая Твое заступление;

Радуйся, от треволнения моря житейскаго zde спасающая избранники Твоя.

Радуйся, милость Сына Твоего и Бога месту сему исходатайствовавшая до скончания века;

Радуйся, рай мысленный показавшая гору сию иноком пустыннолюбивым.

Радуйся, пристанище небурное соделавшая в ней всем ищущим спасения;

Радуйся, сих потребными к постническому житию снабжающая всегда любвеобильно.

Радуйся, жительствующим zde богоугодно подательнице благ временных и вечных;

Радуйся, ходатаице им Царствия Небеснаго.

Радуйся, Милостивая христианом Помощнице.

Кондак 4

Буря недоумения смути старца инокa, егда услыша он песнь нову и пречудну во устех своего ученика, и узре дску каменну, чудотворно начертанную перстом неземным: егда же уведa о посещении дивнаго посетителя, Гавриилом нарекшагося, уразуме, яко той се есть, иже древле благовести Тебе, Дево, безсеменное зачатие Бога Слова. Темже величая величия Твоя, Царице горних и дольних, воспеваше радостно ангелов и человекoв Творцу: Аллилуиа.

Икос 4

Слышавше о посещении Архангелом иноцы Горы Афонския, стекахуся видети дску, чудотворно начертанную письменами песни небесныя, и воспеваху сию благоговейно пред святою иконою Твоею, Владычице, пред Неюже воспет Ю Архангел. Приими Всеблагая и наша пред нею усердно приносимыя Тебе молитвы, с пением таковым:

Радуйся, яко о Тебе радуется ангельский собор;
Радуйся, яко о Тебе торжествует человеческий род.
Радуйся, на руку Твоею носившая Предвечное Слово;
Радуйся, нетесно вместившая во чреве Твоем Творца небесе и земли.
Радуйся, Создателю Твоему плоть заимодавшая;
Радуйся, краснейшаго паче сынов человеческих воплотившая.
Радуйся, поставе красный, одежду плоти Христовы исткавший;
Радуйся, от кровей Твоих девственных порфиру Царя царей составляющая.
Радуйся, девства похвало;
Радуйся, матерей славо.
Радуйся, в рождестве девство сохраняющая;
Радуйся, рождество с девством совокупляющая.
Радуйся, Милостивая христианом Помощнице.

Кондак 5

Боговидец Моисей иногда на каменных скрижалех Закон Божий начертанный на Горе Синайстей получи, иноцы же Горы Афонския песнь небесную во славу Богоматери на дске каменной начертанную от Архангела прияша, и сим наученнии, ангельское славословие Тебе, Пречистая, воспеша, зовуще тако благоволившему о них Триединому Богу: Аллилуиа.

Икос 5

Видевше начальницы Горы Афонския чудо велие в явлении Архангеловом и песни новой, всей Церкви Христовой явленное, дску чудотворно начертанную письменами песни, препроводиша к царю и патриарху Византии, во уверение истины преславнаго сего чудесе: тии же радостно прияша ю, яко залог благоволения небеснаго, и во всей Церкви Православней узакониша воспевати песнь ангельскую в похвалу Тебе, Богородице, зовуще Ти во умилении глубоцем сиче:

Радуйся, преукрашенная лепотами всех добродетелей, Дево;
Радуйся, Невесто Невестная, сияющая девства чистотою.
Радуйся, возрастившая цвет неувядаемый, Христа;
Радуйся, раю словесный, древо жизни посреде имущий,
Пресладкаго Иисуса.
Радуйся, сене небесная, от зноя старостей нас сохраняющая;
Радуйся, покрове миру, ширший облака.
Радуйся, древо благосеннолиственное, прохладу спасительную всем подающее.
Радуйся, источнице воды живыя, от неяже пиящие ктому не умирают.
Радуйся, Судии Праведнаго умоление;
Радуйся, грехов наших прощение.
Радуйся, во славе небесней одесную Бога пребывающая;

Радуйся, земнородных милосердием Твоим не оставляющая.
Радуйся, Милостивая христианом Помощнице.

Кондак 6

Проповедует Святая Церковь величие чудес Твоих, Марие Богородице, и светло красуется воспевая Ти песнь ангельскую, чудесно от небес на землю принесенную чиновначальником горних сил и Твоим изрядным служителем Гавриилом: с нимже помолися, Госпоже Пречистая, к Сыну Твоему и Богу, да незыблему во благочестии и православии сохранит Он Церковь Свою, и посрамит вся возстания еретическая, нас же, верных чад ея, сподобит неосужденно воспевати Ему: Аллилуиа.

Икос 6

Возсияла еси многими лучами чудес от Милостивыя иконы Твоея, Владычице, и сими всю Гору Афонскую облагодатствовала еси благоутробно: милости бо Твоея струи, неоскудно всем требующим от нея источаеши, Дево, и всех подвизаеши звати Тебе:

Радуйся, Радосте наша святая, иконою Твоею нас присно утешающая;

Радуйся, заступнице наша благая, на помощь к нам всегда ускоряющая.

Радуйся, залог спасительный нам в иконе Твоея даровавшая;

Радуйся, Афонскую Гору ея зело прославляющая.

Радуйся, надеждо наша известная;

Радуйся, упование наше непостыдное.

Радуйся, скорбей наших утешение;

Радуйся, печалей наших утешение.

Радуйся, веры православных утверждение;

Радуйся, неверия посрамление.

Радуйся, любви Божественных явление;

Радуйся, чудес преславных совершение.

Радуйся, Милостивая христианом Помощнице.

Кондак 7

Хотящим жати спасение в пустынях Горы Афонския, Милостивая Покровительница и Помощница являешися Мати Божия, и присно ходатайствуеши за них к Сыну Твоему и Богу: аще бо кто тамо и падет в некое согрешение, немощию плоти смущаем, Тобою востание получает во спасение, яко всем хочещи спастися и в разум истины приити жительствующим в жребии Твоем, и немолчно воспевающим Христу, Царю и Богу: Аллилуиа.

Икос 7

Ново небо и нова земля уготованы Сыном Твоим и Богом, любящим Его, Госпоже Всеблагая, к нимже стяжахом Тя Путеводительницу и Наставницу, аще токмо внимаем внушением Твоим Божественным. Молим Тя Царице Всемилолюбивая, не попусти нас погибнути в дебрех греховных, но приведи нас стезею правую в страну света и радости вечных, да Тебе вопием хвалебно:

Радуйся, Сиона горняго первейшее украшение;

Радуйся, обителей дольних присноготовое заступление.

Радуйся, земле благая, клас спасительный миру

израстившая;

Радуйся, ниво неоранная, оплодотворенная Духом.

Радуйся, огонь Божества во чрево Твое приемшая;

Радуйся, глад падшаго человечества Хлебом Жизни
утолившая.

Радуйся, Херувимскаго Царя престоле;

Радуйся, Серафимскаго Владыки палато, преукрашенная
чистотою.

Радуйся, храме одушевленный Триипостаснаго Бога;

Радуйся, вместилище Божества.

Радуйся, Милостивая христианом Помощнице.

Кондак 8

Странное и преславное явление Архангела, на Горе Афонстей
иногда бывшее, смотрение бысть Божественное, имже прославися
препетое имя Твое, Марие Богородице, и все вернии научишася
ангелоподобно воспевати Тя, Херувимов честнейшую и Серафимов
славнейшую Матерь Бога нашего, о нейже радуется всякая тварь,
и род человеческий благодарно взывает ко Господу: Аллилуиа.

Икос 8

Все упование наше на Тя возлагаем, Мати Божия, и в
скорбех наших к святей иконе Твоей усердно притекаем, чающе от
нея утешение благодатное получитьи, Твоим милостивым к нам
участием, Всеблагая. Помози нам Владычице, с терпением и
благодарением всякия скорби переносити, и вместо ропота
малодушнаго, благоумиленно взывати Тебе:

Радуйся, всех скорбящих Радосте;

Радуйся, всех печальных Утешение.

Радуйся, труждающихся и обремененных сладкий покое;

Радуйся, болезнующих и огорченных живительная отрадо.

Радуйся, в час скорбных недоумений мысль благую на сердце
полагающая;

Радуйся, во дни уныния надеждою вечных благ
воодушевляющая.

Радуйся, искушаемым руку помощи Твоя простирающая;

Радуйся, гнев Божий от глав наших отводящая.

Радуйся, мирное устройство обуреваемым напастьми подающая;

Радуйся, во благих желания наша дивно исполняющая.

Радуйся, терпеливых страдальцев дарами благодатными
увенчивающая;

Радуйся, иноков благоподвизающихся блаженства райскаго
сподобляющая.

Радуйся, Милостивая христианом Помощнице.

Кондак 9

Все ангели небеснии немолчными похвалами Тя ублажают
Царице и Владычице всея твари, мы же земнии и перстнии кою
похвалу достойную принесем Ти, Всепетая; обаче надеющиеся на
милосердие Твое неисчетное, любовь к Тебе понуждаеми, поем
чудеса Твоя, проповедуем благодеяния Твоя, славословим имя
Твое, и усердно припадая к многоцелебней иконе Твоей, рабски
вопием изображенному на ней вкупе с Тобою, Богомладенцу
Христу: Аллилуиа.

Икос 9

Ветий риторския глаголы, недовольны к пению чудес Твои, Богородице, обаче Благая сущи, веру нашу, вместо риторскаго благословесия, милостиво прими, веси бо и любовь нашу, еуже сердца наша к Тебе исполненни. Темже благоутробно услыши нехитростныя наша песни, имиже дерзаем благохвалити Тя сице:

Радуйся, сопрестольное Отцу Слово в ложеснах Твоих вместившая;

Радуйся, Свет незаходимый рождающая.

Радуйся, жизнь вечную миру даровавшая рождеством Твоим;

Радуйся, ангельскаго Царя, яко младенца на руку Твоею носившая;

Радуйся, граде одушевленный Присноцарствующаго;

Радуйся, скиние освященная Живаго Бога.

Радуйся, нижняя сочетавшая с вышними;

Радуйся, Мироположнице, Божественнаго мира преисполненная.

Радуйся, добрых виновная;

Радуйся, злых пременение.

Радуйся, оружие на враги всекрепкое;

Радуйся, щите верных несокрушимый.

Радуйся, Милостивая христианом Помощнице.

Кондак 10

Спасительное прибежище от сует мира прелестнаго, явися жребий Твой земный, святая воистину Гора Афонская, Богородице Дево, освященная многими Твоими чудесы, преисполненная причастными благодати Твоими иконами, и населенная иноками, верно служащими в преподобии Сыну Твоему и Богу, Егоже умоляти не престай, Всеблагая, не отступна пребывает благодать Его от места сего, Тобою и возлюбленнаго, на немже от лет древних поется Ему хвалебная песнь: Аллилуиа.

Икос 10

Стена еси заступления девственным ликостояниям, Преблагословенная Дево, и столп крепок от лица вражия всем подвижником чистоты: Тебе бо дадеся велия сила, темныя адския силы победати, и от искушений их душепагубных человеки избавляти наипаче тех, иже целомудренно и свято на земли пребывают. Сего ради девства рачители согласно Тебе зовут:

Радуйся, чистотою сияющая паче солнца;

Радуйся, девства начало и освящение.

Радуйся, крине, облагоухавший падшее человечество;

Радуйся, во смирении Твоем осененная благоволением Всеvyšняго.

Радуйся, верная рабо Господня;

Радуйся, яко Тя блажат вси роди.

Радуйся, столпе утверждения всем подвижником чистоты;

Радуйся, венче доброты, исплетенный десницею

Вседержителя.

Радуйся, знамение Божия к людем благоволения;

Радуйся, грешных к Богу дерзновение.

Радуйся, одеянная в светлую ризу милостей и щедрот;

Радуйся, преисполненная сострадания и любви к
христианскому роду.

Радуйся, Милостивая христианом Помощнице.

Кондак 11

Пение наше, аще и тмочисленное бы было, не довлеет к
достойному прославлению многих милостей Твоих и щедрот,
Преблагословенная Матерь Господа нашего, имже непрестанно
благодетельствуеши роду нашему: обаче да не неблагодарни
явимся пред Тобою, Благодетельнице наша, по силе нашей
благодарственных песни Тебе приносим с верою и любовью, и
прославляя неисчетная чудотворения Твоя, вопием Верховному
Творцу чудес Богу: Аллилуиа.

Икос 11

Светоподательными лучами чудес икона твоя «Милостивая»,
Владычице, на святей Горе Афонстей немерцаемо сияет, и весь
мир православный благодатно просвещает. Сего ради грядут к ней
от лет древних на поклонение православных соборы,
благодарно воспевая пред нею благохваления Ти таковая:

Радуйся, Царя Христа миру явившая;

Радуйся, на иконе Твоей вкупе с Ним изображенная.

Радуйся, клеще таинственная, Исаиею провиденная;

Радуйся, Купино неопалимая, боговидцем Моисеем

предзримая.

Радуйся, руно орошенное Гедеона;

Радуйся, чаше приосененная Аввакума.

Радуйся, двери затворенная Иезекииля;

Радуйся, горо несекомая Даниила.

Радуйся, многжды от пророк предвозвещенная;

Радуйся, пророческих речений сбытие принесшая.

Радуйся, Милостивая христианом Помощнице.

Кондак 12

Благодати причастная Твоя икона, Богородице Дево, яко
утварь драгая Церкви Христовой подадеша от щедрот Твоих,
Всеблагая, в нейже обещалася еси с нами быти до скончания
века, рекши о первописанней твоей иконе: «с нею благодать Моя
и сила!» Веруем Всепетая, яко не оскудеет глагол Твой сей и
ныне, в иконе Твоей святей на всяцем месте, идеже верно поется
Сыну Твоему и Богу хвалебная песнь: Аллилуиа.

Икос 12

Поюще чудеса Твоя, Богородице, припадаем усердно к
милостивей и чудодейственной иконе Твоей, лобызаем ю с
сердечною любовью, и яко присно сущей Ти с нами молим Ти ся
прилежно: возри на ны милосердием Твоим, Мати Божия, и якоже
Тя зрим ныне на иконе изображенную, тако сподоби нас узрети Тя
в час грозный смертный, от руки диаволи нас исхищающую и в
Царствие Христово приводящую ны, державною десницею Твоею, да
Тебе благодарственно взываем:

Радуйся, по Бозе крепкое нам прибежище и покрове;

Радуйся, матерними щедротами Твоими весь мир христианский
объемлющая.

Радуйся, во всех добродетелех верная утверждающая;
Радуйся, благую христианскую кончину убожающим Тя
подающая.

Радуйся, от власти лютаго миродержца уповающих на Тя
избавляющая;

Радуйся, на мытарствах воздушных славящая Тя заступающая.

Радуйся, вратарнице Божественная, врата райския милостиво
нам отверзающая;

Радуйся, Царствие Горнее любящим Тя ходатайствующая.

Радуйся, во славе небесней приседая Сыну Твоему и Богу;

Радуйся, созерцати славу Его Божественную чтущия Тя
сподобляющая.

Радуйся, телес наших здравие;

Радуйся, душ наших спасение.

Радуйся, Милостивая христианом Помощнице.

Кондак 13

О Всепетая Мати, рождающая святых Святейшее Слово, от ангел
певаемая на Небеси, и от человек славимая на земли! Приими
милостиво сие малое моление наше, и даруй телесное здравие и
душевное спасение всем, верно восхваляющим Тя, и поющим о Тебе
Триединому Богу: Аллилуиа.

Этот кондак читается трижды, затем икос 1-й и кондак 1-й

Молитва Пресвятой Богородице перед ея иконой, именуемой «Милостивая»

О Пресвятая и преблагословенная Мати Господа, Бога и
Спаса нашего Иисуса Христа, Милостивая Богородице и Приснодево
Марие! Припадая к святей и чудотворней иконе Твоей, смиренно
молимся Тебе, Благой и Милосердой Заступнице нашей: вонми
гласу грешных молений наших, не презри воздыханий от души,
виждь скорби и беды нас обышедшия, и яко любвеобильная
воистину Мати потщися на помощь нам беспомощным, унылым, во
многия и тяжкия грехи впадшим и присно прогневляющим Господа и
Создателя нашего, Егоже умоли, Предстательнице наша, да не
погубит нас со беззаконными нашими, но явит нам человеколюбную
Свою милость. Испроси нам, Владычице, у благодати Его, телесное
здравие и душевное спасение, благочестное и мирное житие,
земли плодоносие, воздуха благорастворение, дожди
благовременны и благословение свыше на вся благая дела и
начинания наша, и якоже древле призрела еси милостиво на
смиренное славословие послушника Афонскаго, воспевавшего Ти
песнь хвалебную пред Пречистою иконою Твоею, и послала еси к
нему Архангела Гавриила научити его пети песнь небесную, еуже
славословят Тя ангели горе, сие приими благоутробно и наше
ныне усердно приносимое Тебе молитвословие, и принеси е Сыну
Твоему и Богу, да милостив будет Он нам грешным, и пробавит
милость Свою всем чтущим Тя и с верою поклоняющимся Святому
Образу Твоему. О Царице Всемиловитая, Мати Божия Всеблагая,
простри к Нему Богоносныя Твои руце, имиже Его, яко младенца
носила еси, и умоли Его вся ны спасти и избавити погибели
вечныя. Яви нам, Владычице, Твоя щедроты: болящия исцели,
скорбящия утеша, бедствующим помози: благопоспеси всем нам
носити иго Христово в терпении и смирении, сподоби нас

благочестно житие сие земное скончати, христианскую
непостыдную кончину получитьи, и Небесное Царствие унаследити,
Матерним ходатайством Твоим к рождшемуся от Тебе Христу Богу
нашему, Емуже со Безначальным Его Отцем и Пресвятым Духом,
подобает всякая слава, честь и поклонение, ныне и присно, и во
веки веков. Аминь.

Празднование 12/25 ноября и 26 декабря/8 января